

[Nürnberg], 30. Dezember 1552

Von Joachim Camerarius d. Ä.

Druck: Camerarius, Epistolae S. 451f.

S. D. Lipsiae cognoueram te Augustae quasi restitisse, cùm putareris in Misniam venturus. Id consilium tuum, modò tibi fructuosum sit, valde probo. Nam omnia nescio quo pacto μικρολογώτερα indies fieri videntur, in omnibus ijs quae ad studia litterarum pertinent. fortasse quia alijs curis afficiuntur, armorum inquam et belli. Sed de hoc statuam, cùm tu mihi perscriperis quo in loco sint res vel saltem spes tuae: idqüe vt facias, te rogo. Ego menses hos quatuor quibus vnà cum domo vniuersa Lipsia absum metu pestilentiae, ferè totos absumsi peregrinando. Nunc animus erat hîc aliquantis per acquiescere. Nam statio in patria διὰ τὴν ἀσυνήθειαν τοῦ χώρου displicebat. Audio Cyprianum quem aliquando hîc vidi, Bohemum vt opinor, edidisse tabulas astronomicas nescio quas. Velim si videatur, illum à me salutes. Et cognoscas, nisi iam fortè scis, cuiusmodi illae πίνακες, et an editae sint, et si sint, vbi. Erit hoc à te officium mihi gratum. Debes autem tibi persuadere eandem esse voluntatem erga te meam, quae semper, et me cupere quacunque occasione possim tibi gratificari studio meo. Cum meo Chetzmano tibi iam aliquid vsus intercedere arbitrabar, quem te mea etiam caussa complecti benevolentia tua velim. Vale. 3. Cal[endas] Ianuar[ij]. Anni salutiferi partus 1553.